

Visoki predstavnik dobitnik priznanja „Ključ grada Sarajeva“



Visokom predstavniku u BiH, Valentinu Inzku, dodijeljen je “Ključ grada Sarajeva”, priznanje koje se daje građanima BiH i stranim državljanima koji su dali značajan doprinos razvoju i očuvanju civiliziranih vrijednosti i mira u svijetu. Nagrada “Ključ Sarajeva” simbol je stalne veze između grada Sarajeva, njegovih građana i osobe kojoj je nagrada dodijeljena.

Gosp. Inzko je izjavio da mu je čast biti u društvu ljudi kao što su papa Franjo, Riccardo Muti i drugi, kojima je u prošlosti također dodijeljen “Ključ Sarajeva”, te što je na taj način postao dio historije Sarajeva.

“Ja sam službeno vezan za Sarajevo od 1996. godine, kada sam bio prvi rezidentni ambasador Austrije u BiH. Ta veza se nastavila kada sam postao direktor za Jugoistočnu Evropu u Beču, te od 2009. godine kada sam postao visoki predstavnik i ponovo dobio sarajevsku adresu. Sarajevo i njegovi građani su davno otključali moje srce, a ja se nadam da sam ostavio pozitivan trag u ovom gradu i u srcima njegovih građana”, rekao je visoki predstavnik.

Nagradu „Ključ Sarajeva“ visokom predstavniku je uručio gradonačelnik Sarajeva, prof. dr. Ivo Komšić, na svečanoj sjednici Gradskog vijeća održanoj u okviru obilježavanja 6. aprila, Dana oslobođenja Sarajeva.

Zajedno s Christianom Amanpour iz CNN-a, gospodin Inzko je 2000. godine dobio titulu „Počasnog građanina Sarajeva“ na osnovu zasluga u svojstvu prvog poslijeratnog austrijskog ambasadora u Bosni i Hercegovini.